

Presuda Kantonalnog suda Zenica

Mehmedović i Korajlić oslobođeni optužbi za zloupotrebu položaja

Vijeće smatra da Tužilaštvo nije dokazalo postojanje namjere i prouzrokovanje štete

Bivši ministar unutrašnjih poslova Zeničko-dobojskog kantona Šemsudin Mehmedović i bivši šef sektora policije Nedžad Korajlić jučer su pred Vijećem Kantonalnog suda u Zenici oslobođeni optužbe Kantonalnog tužilaštva da su počinili krivično djelo zloupotrebe položaja i ovlasti u vrijeme dok su obavljali ove dvije funkcije.

Oni su bili optuženi da su oružje i opremu, vrijednosti 514.100 KM, podijelili iz skladišta MUP-a privatnim licima u zenici i Tešnju, čime su, prema Tužilaštvu, počinili krivično djelo.

Nema dokaza za optužbe

Jučerašnjem izricanju presude, uz optužene Mehmedovića i Korajlića te njihove advokate Senku Nožicu i Almina Dautbegovića, prisustvovalo je pedesetak prijatelja, rođaka i članova porodice oslobođenih, koji su burnim aplauzom pozdravili oslobađajuću presudu.

Kako je istakao predsjednik Sudskog vijeća sudija Enes Maličbegović, Tužilaštvo nije uspjelo dokazati da su Mehmedović i Korajlić počinili to djelo. Vijeće smatra da su „kolegij MUP-a te najmanje tridesetak ljudi bili uključeni u organizovanje i dislokaciju“ oružja, za



Mehmedović u zagrljaju članova porodice

koje su bili optuženi Mehmedović i Korajlić.

Žalba Tužilaštva

Sudija Maličbegović istakao je kako Vijeće nije uvjereni da postoje dva veoma bitna elementa krivičnog djela, i to „nanošenje štete“ i „pribavljanje koristi“, a da, iako je očigledno da je distribucija oružja iz skladišta MUP-a u privatne kuće zaista izvršena, ne postoje dokazi niti osobe koje su se okoristile, kao ni institucija

koja je oštećena, jer su sve oružje pripadnici MUP-a naknadno prikupili od građana prema postojećim spiskovima i vratili ih u okviru akcije „Zetva“.

Iako njihov predstavnik nije prisustvovao izricanju presude, u Kantonalnom tužilaštvu nam je nakon izricanja presude saopćeno „da je Tužilaštvo začuđeno i iznenađeno izrekom presude te da će žalbu pripremiti i uputiti Vrhovnom sudu, nakon što je dobije u pismenoj formi“. **A. DŽONLIĆ**

Suđenje za ratni zločin u Travniku